

Utusan Malaysia - 2 Mac 2016

15 pencalonan UniSZA ke Anugerah Tokoh Siswa

KUALA TERENGGANU 1 Mac - Universiti Sultan Zainal Abidin (UniSZA) berhasrat mengulangi kejayaannya dalam Anugerah Tokoh Siswa Kementerian Pendidikan Tinggi dengan menghantar 15 pencalonan bagi bersaing dalam pelbagai kategori yang dipertandingkan, tahun ini.

Timbalan Naib Canselornya (Hal Ehwal Pelajar dan Alumni), Prof. Madya Dr. Nik Wan Omar berkata, daripada jumlah itu, difahamkan kira-kira tujuh pelajar institusi berkenaan berada dalam senarai akhir pengajur sebagai antara calon pemenang bagi kategori berkaitan.

"Tahun lalu, lima pelajar kita berjaya memperoleh kejayaan dalam anugerah itu dengan salah seorang daripadanya iaitu, Ju Ariana Ibrahim mengungguli dua kategori iaitu Anugerah Menteri Pendidikan 2014 dan Anugerah Sukrelawan (Terbuka) Terbaik.

"Kami di UniSZA sentiasa menggalakkan pelajar terlibat dalam program kepemimpinan sejak hari pertama mereka menjepakkan kaki ke sini, dan pendekatan itulah yang mendorong kepada kecemerlangan kita di peringkat kebangsaan di samping menjadi contoh terbaik kepada penuntut lain," katanya.

Beliau berkata demikian ke-

pada pemberita selepas Majlis Ramah Mesra Pelajar Baharu bersama Menteri di Jabatan Perdana Menteri, Datuk Sri Jamil Khir Baharom merangkap Menteri Mentor universiti itu di Dewan Perdana, kampus Gong Badak dekat sini kelmarin.

Dalam pertandingan tahun lalu, Ju Ariana, yang berasal dari Klang, Selangor membawa pulang trofi, sijil, wang tunai RM4,000 serta sebuah motosikal Kriss Modenas selepas diumumkan sebagai pemenang bagi kedua-dua kategori tersebut.

Selain Ju Ariana, pelajar yang turut menerima anugerah dalam majlis berkenaan ialah Wan Hazreen Nadia Wan Ismail menerusi Anugerah Pemimpin Kebudayaan Terbaik diikuti Intan Lyana Zainal Abidin bagi Anugerah Pemimpin Badan Uniform Terbaik; Mohamad Firdaus Ahmad (Anugerah Pemimpin Program Keusahawanan Terbaik) dan Muhammad Nur Syazwan Zainudin pula diumumkan sebagai penerima Anugerah Pemimpin Program Sukarelawan Terbaik.

Menurut Dr. Nik, UniSZA menganjurkan ribuan aktiviti yang dikendalikan pelajar dengan 1,700 pada tahun lalu, sekali gus mencatatkan peningkatan berbanding hanya 1,400 tahun sebelumnya.